

傷寒譜

上海古籍書店復印
六冊 定價三十五元

四七·一·三五〇·八〇·五



傷寒譜卷八

後漢張

機仲景原文

嘉定沉鳳輝丹彩集註

金山

想南錢樹棠
素然錢樹立

校刻

厥陰經大意

程扶生云厥陰者陰之盡也厥字從逆從欠謂陰之盡而不足乎陽將上逆而接乎陽者也內經謂一陰至絕處却作朔晦是也故熱入厥陰者要陽邪出表不至內擾乎陰則愈寒入厥陰者要陽氣來復得以入而救陰則愈皆以外陽得接乎內陰爲順蓋厥陰一證經雖屬陰總欲其氣通於陽也邪既入陰之盡與陽不接勢必



南京中醫藥大學圖書館版權所有

厥逆內攻其裏勢必下利爲喉痺爲膿血皆陽勝之過也爲除中爲戴陽皆陰盛之極也世之治厥陰者若涉大海茫無津涯吾爲兩言以蔽之治厥者辨其寒厥熱厥而已矣治利者辨其寒利熱利而已矣至於爲嘔爲噦亦莫不有寒熱之別也故以仲景言寒言熱者分類而次俾學者覽之無多岐之惑焉

厥陰全篇

厥陰之爲病消渴氣上撞心心中疼熱飢而不欲食食則吐衄下之利不止

柯韻伯云太陰厥陰皆以裏證爲提綱太陰主寒厥陰

主熱太陰爲陰中之至陰厥陰爲陰中之陽也太陰腹滿而吐食不下厥陰飢不欲食食卽吐衄同是不能食而太陰則滿厥陰則飢同是一吐而太陰吐食厥陰吐衄此又主脾主肝之別也太陰病則氣下陷故腹時痛而下利厥陰病則氣上逆故心疼熱而消渴此溼土風木之殊也太陰主開本自下利而下之則開折胸下結鞭者開折反闔也厥陰主闔氣上撞心而下之則闔折利不止者闔折反開也按兩陰交盡名曰厥陰又名陰之絕陽則厥陰爲病宜無熱矣以厥陰脈絡于少陽厥陰熱證皆被相火之化厥陰經脈上盛則肝氣旺故上

撞于心氣有餘卽是火故消渴而心中疼熱火能消物故肌肝脈挾胃肝氣旺而胃受木賊故不欲食也蟲爲風化厥陰病則虵動再聞食臭則入於膈而從口出也病在陰而反下之則氣無所主息而利不止矣烏梅丸可以除虵亦可以止利也

魏念廷云此申解厥陰傳經熱邪爲患舉其證以禁誤下也傷寒之邪傳入少陰爲裏中之裏及自少陰傳厥陰又爲三陰之極盡處矣陰盡處受邪無所復傳却同少陽爲升降之出路少陽無下法厥陰陰邪亦無下法下之爲誤可知矣首標消渴二字凡熱必渴而寒溼阻

隔正氣亦有渴者然其渴雖欲飲水必不能多未有渴而飲飲而仍渴隨飲隨消隨渴若是者則消渴爲傳經之熱邪傳入厥陰無疑也

沈堯封云此厥陰病之提綱也消渴氣上撞心中疼熱飢不欲食食則吐衄之外更有厥逆往來或嘔或利等證猶之陽明病胃家實之外更有身熱汗出不惡寒反惡熱等證於陽明病必須內外證合見乃是真陽明厥陰病亦必內外證合見乃是真厥陰其餘或厥或利或嘔而內無氣上撞心中疼熱等證皆似厥陰而實非厥陰也

傷寒論
厥陰病渴欲飲水者少少與之愈

周禹載云正氣復則邪熱退然津液已傷故渴欲飲水者不妨少與之正與胃氣和者同意倘多與不免水邪有停畜之變

汪苓友云厥陰有消渴一證不言自愈者蓋熱甚而津液消鑠雖飲水不能勝其燥烈乃邪氣深入未愈之徵也而此條之渴欲飲水與之愈者蓋其熱非消渴之比乃邪氣向外欲解之機也兩者自是不同

厥陰中風脈微浮爲欲愈不浮爲未愈

陳亮師云上節言厥陰之證此節言厥陰之脈三陽經

中風有中風形證傷寒有傷寒形證至太陰中風尙有四肢煩疼二證而少陰厥陰但有中風之脈而無中風之證蓋二經受病邪入已深風寒形證更無分別但陰經之脈當沉細今反浮者以風爲陽邪元氣復而邪將散故脈見微浮也浮則欲愈矣若脈不浮是邪氣深入不能外散故爲未愈

柯韻伯云厥陰受病則尺寸微緩而不浮今微浮是陰出之陽也厥陰有欲愈之中風脈則應有未愈之中風證夫以風木之藏復中於風其變端必有更甚他經者今不得一焉不能無闕文之憾

厥陰病欲解時從丑至卯上

錢天來云厥陰肝藏乃含生氣於土中尙未透地之木自子而一陽初生木之萌芽未長丑爲二陽則陽氣長木之根荦萌於陰土之中至寅而三陽將透地陽氣已旺萌芽苗長將出未出之時也卯則陽氣已出草木發生正厥陰木旺之時邪氣至此而解矣故曰從丑至卯上

方中行云六經皆解於旺時而三陽解自寅至亥三陰解自亥至卯厥陰之解自寅卯而終少陽之解自寅丑而始何也蓋寅爲陽初動陰尙強卯爲天地闢陰陽分

所以二經同旺其病之解由此而終始也然三陽之時九各不相襲三陰之旺時五太陰與少陰同子丑陰與厥陰同丑寅何也以陽行健其道長故不相及陰行鈍其道促故皆相躡也

右四節論厥陰脈證大畧

傷寒一二日至四五日而厥者必發熱前熱者後必厥厥深者熱亦深厥微者熱亦微厥應下之而反發汗者必口傷爛赤

陳亮師云一二日者謂傳經熱邪入厥陰後一二日也四五日者邪熱留於厥陰復四五日也若從陽經計之

日數不止四五日矣其至一二日或四五日而方厥者
前之發熱尙淺迨久而歸裏蓋熱厥之證從陽經傳
與直中之寒厥大異此未厥之先邪在陽經必發熱
次傳入厥陰其熱邪盡入於裏故前熱者後必厥也
鬱於內中道不通經脈不接遂爲熱厥厥深者通四
肢臂以上皆冷也厥深則其內熱亦深厥微者但手
足逆冷也厥微則內熱亦微當隨其厥之淺深以定
熱之輕重而爲治法之輕重下之者非下胃也下去
在裏之熱邪也若誤汗之則熱邪燔灼而口傷爛赤
以厥陰脈循頰裏環唇內熱邪從內徹外自下及上
而變見若此

柯韻伯云陽邪乘陰而厥熱互見與陰厥亡陽者迥別欲知其熱邪之多寡卽觀其厥逆之微甚厥之久者熱亦久厥之輕者鬱熱亦輕故熱與厥相應也夫熱發三陽未入於府者可汗熱在三陰已入於藏者可下今熱入陰而反發汗陽邪不能外散被辛甘之藥所逼必上走空竅口傷爛赤所由來矣下之清之之謂對發汗而言此是胃熱不是胃實非三承氣所宜厥微者當四逆散枳實以攻裏芍藥以瀉木柴胡甘草以和解也厥深者當白虎湯參甘粳米以扶中石膏知母以除熱也沈堯封云此正邪分爭一大往來寒熱病也厥深熱亦

深厥微熱亦微猶言寒重則發熱亦重寒輕則發熱亦輕論其常理也其有不然者可以決病之進退矣故下文卽論厥少熱多厥多熱少不知注傷寒者皆以熱字作伏熱解遂令厥陰病有熱無寒矣不思烏梅丸是陰主方如果有熱無寒何以方中任用薑附桂辛椒大辛熱耶蓋厥陰爲三陰之盡病及此者必陰陽錯雜况厥陰肝木於卦爲震一陽居二陰之下是其本象病則陽泛於上陰伏於下而下寒上熱之證作矣其病藏寒統上入膈是下寒之證據也消渴心中疼熱是上熱之證據也况厥者逆也下氣逆上卽是孤陽上泛其病多

升少降凡吐衄氣上撞心皆是過升之病治宜下降其
逆上之陽取內經高者抑之之義其下之之法非必硝
黃攻剋實熱方爲下劑卽烏梅丸一方已具方中毋論
黃連烏梅黃柏苦酸鹹純陰爲下降卽附子直達命門
亦莫非下降藥也下之而陽伏於下則陰陽之氣順而
厥可愈矣倘誤認厥爲外寒所束而反發其汗則心中
疼熱之陽盡升於上而口傷爛赤矣以表藥多升而厥
陰之脈環脣內也

程扶生云後云諸四逆者不可下之此云厥應下之此
寒熱之別也前賢謂熱厥者手足雖冷而乍有溫時手

足雖逆冷而手足掌心必熱戴院使又以指甲之冷暖別厥證之寒熱皆慎之至也

傷寒病厥五日熱亦五日設六日當復厥不厥者自愈厥終不過五日以熱五日故知自愈

陳平伯云厥陰病先熱者後必厥而厥止者必發熱則熱後又慮其復厥矣今條中云熱亦五日則知熱亦五日而止故慮其六日之當復厥也若外熱不止亦何見六日之當厥耶惟熱止而厥不復至斯爲熱邪自解不是熱去內入仲景復申之曰厥終不過五日以熱五日隱然見五日而厥止者熱亦五日而罷不特無熱邪深



入之虞亦并無熱氣有餘之患矣故可不藥而自愈也
程扶生云言陰陽勝復之數恰相當而以陽勝爲愈也
陰勝則厥陽勝則熱設六日爲陽勝故當復厥設不厥
爲陽全勝故愈若先熱後厥者厥之盡亦不過五日以
熱五日計其往復之數當自愈也

傷寒發熱四日厥反三日復熱四日厥少熱多其病當愈
四日至七日熱不除者其後必便膿血

程郊倩云厥陰少陽一藏一府少陽在三陽爲盡陽盡
則陰生故有寒熱之往來厥陰在三陰爲盡陰盡則陽
生故有厥熱之勝復凡遇此證不必論其來自三陽起

自三陰祇論厥與熱之多少熱多厥少知爲陽勝陽勝病當愈厥多熱少知爲陰勝陰勝病日進熱在後面不退則爲陽過勝過勝而陰不能復遂有便血諸熱證厥在後而不退則爲陰過勝過勝而陽不能復遂有亡陽諸死證所以調停二者治法須合乎陰陽進退之機陽勝宜下陰勝宜溫若不圖之於早坐令陰竭陽亡其死必矣

周禹載云熱邪向外則發熱入裏則爲厥厥少則邪不內據熱多則邪欲外達故病當愈也設發熱過多則陰血傷而下注必有便膿血之患矣治法清血中之熱熱